

01 AUG 1998

Mahathir-Afrika

GENERASI BARU PEMIMPIN AFRIKA LEBIH FOKUS KEPADA PEMBANGUNAN EKONOMI

SEPANG, 1 Ogos (Bernama) -- Datuk Seri Dr Mahathir Mohamad berkata generasi baru pemimpin Afrika telah muncul dan mereka lebih memberi tumpuan kepada pembangunan ekonomi negara dan rakyat mereka.

Dr Mahathir berkata semasa menghadiri Dialog Antarabangsa Selatan Afrika (SAID) di Namibia baru-baru ini, beliau mendapati para pemimpin Afrika berbeza daripada dahulu dan mereka bukan lagi diktator-diktator yang gila kuasa yang hanya berminat untuk memperkayakan diri mereka sendiri.

"Ini adalah generasi baru pemimpin Afrika yang betul-betul berminat untuk membangunkan negara dan memberi kehidupan yang lebih baik kepada rakyat mereka," katanya kepada pemberita sekembalinya dari lawatan ke Afrika Selatan, Namibia dan Mozambique hari ini.

Pada dialog itu, Dr Mahathir yang berucap di atas tajuk "Pentadbiran Global yang Koperatif" juga bercakap mengenai krisis kewangan Asia. Empat belas negara Afrika menyertai dialog itu.

Dr Mahathir berkata pemimpin-pemimpin Afrika itu amat berminat dengan pendekatan yang diambil Malaysia menerusi konsep "perkongsian bijak".

Beliau juga mengambil kesempatan untuk menerangkan langkah-langkah yang diambil Malaysia dalam usaha mengatasi masalah ketidaksamarataan antara Bumiputera dan bukan Bumiputera.

Dr Mahathir berkata Barat tidak membantu negara-negara membangun di Afrika dan lebih memberi tumpuan kepada isu-isu seperti kebebasan, ketelusan yang lebih lagi, ekonomi yang lebih terbuka dan masalah-masalah di negara-negara seperti Angola dan Sierra Leone.

"Mereka hanya tahu bercakap tentang kerajaan ini tak baik, kerajaan itu tak baik dan tidak mengiktiraf perubahan sikap pemimpin-pemimpin Afrika yang sekarang memberi fokus terhadap pembangunan ekonomi negara dan rakyat mereka," kata beliau.

"Dan mereka nampak kalau ada peluang untuk merebut kekayaan di Afrika, mereka akan berbuat demikian ...umpamanya dengan menyerang Afrika Selatan walaupun dia bukanlah begitu maju," katanya merujuk kepada serangan terhadap matawang Afrika Selatan, rand, beberapa minggu lepas yang menyebabkan nilainya turun 30 peratus.

Dr Mahathir berkata jatuhnya nilai rand menyebabkan negara-negara berdekatan terpaksa menurunkan nilai matawang mereka untuk membolehkan mereka bersaing dengan Afrika Selatan.

"Dengan itu, negara-negara membangun menghadapi masalah yang serius dan mereka berpendapat mereka mempunyai banyak persamaan dengan kita dan mereka melihat apa yang sedang berlaku di Asia Tenggara dan Asia Timur dengan keseimbangan," katanya.

-- BERNAMA

MAM TCL WAT